



Küm 30 sülen Jibon Asom-i
ULFA-I nungi sodi agir

Russia-i Alexei Navalny indang
Network nokdangtsü akok

VOL. XVIII NO. 191 (ADOK 191) DIMAPUR

TENTONÜ (MONDAY)

RONGCHII (APRIL) 26, 2021

₹ 5.00

Delhi nung ghonda shia nisung 12 asür



Delhi nung Covid ajanga asürtem mang rongdokba noksa nung angur. (file noksa)

Nw Delhi, April 25 (Agencies): Delhi nung medical oxygen peria mengui timtemba den Hombar nungi tenzüka COVID-19 ajanga ghonda nisung 12 shi süogo.

Hombar (April 19) nungi Honibar (April 24) tsünga Delhi nung nisung 1,777 süogo aser ibaji ghonda shia nisung 12 asüba ama lir, ta government data ajanga metetdaksüogo.

Taoba hopta, April 12 nungi 17 tsünga Delhi nung nisung 677 asü aser ibaji ghonda shia nisung pungugu asüba ama liasü.

COVID-19 wara tanabuba tenzüker Delhi nung nisung timtiba asübaaji Honibarnü liasü. Yashi nisung 357 tashi asü aser ibaji ghonda shia nisung 15 asüba ama liasü.

Hombar nungi tenzüka Delhi nung anogoshia nisung 23,500 den timba dak COVID-19 aliba puteta arur aser yashi tashi nung nisung ajak agi lakh 1.51 shi kumogo.

Hombarnü Delhi nung containment zones 15,039 liasü saka Honibar (April 24) tashi nung containment zones 24,802 kumogo.

Dimapur Government College shibanger

Dimapur, April 25 (Agencies): Hokolbarnü Dimapur Government College nung tetsür kaketshir 4 dak COVID-19 aliba putetba agi Hombar nungi college shibanger ta DGC principal-i metetdaksüogo.

April 26, 2021 nungi college shibangtsü anungji kaketshirtem shinga marutsü aser online class agütsüba osang angata alitsü mettedaktsür, ta Principal-isa ashi.

Hostel nung alir tetsür kaketshir 5 dak Covid agi shirangba yimya ajitetba agi Civil Hospital Dimapur nung COVID-19 tendangtsü atema anir ao aser hostel nung aliba tanüngba kaketshirtem shinga hostel nungi

me yok.

Par pungu rongnungi pezü dak COVID-19 aliba putet aser iba jagi parnok Covid hospital, Chumukedima-i anir ao anepaludar aser tang tajungba lir, ta DGC principal-isa metetdaksü.

Kaketshir pezü den külemi kazür kaketshir pungu tashi balaka mongdar aser parnoka Hombarnü Covid tendangtsü, ta paisha ashi.

"Kaketshirtem dak tendangba osang anguba sülen ang CMO-i college ajunga shibangtsü asü masü'ar teletmetba agitsü. Iba jagi tang atemabo DGC nung Girls hostel dang shibanga lir" ta principal-isa metetdaksü.

European Union & Germany-i India yaritsü metetdaksür

New Delhi, April 25 (Agencies): India nung Covid wara tanabuba agi timtemba mapang European Union, Israel aser Germany linüktemi teyari agütsütsü osang metetdaksüogo.

Taküm March ita tetenzüklen nungi India nung nisung aika dak Covid puteta aruba nungi Europe-i tenük yoker. Tanü anüngdang Europe-i India nem teyari agütsütsü osang metetdaksü.

"India-i teyari meshia mepishiba ama onoki EU Civil Protection Mechanism tenzüko. EU-i akokba tashi India nung alirtem yaritsü. ERCC-i EU MS den yaritepdar aser oxygen o mozü agütsütsü renemogo" ta European Commissioner for Crisis Management, Janez Lenarcic-i metetdaksü.

Israel nungi official sangdong kecha mali saka Israeli Public Broadcasting Corporation nungi Amichai Stein-ibo Israel sorkari India yaritsü teletmetba agiogo ta

"India nung Covid 19 tensa atema Israel-i medical aid yoktsü bilemdar" ta Amichai Stein-i Twitter nung ashi.

German Chancellor Angela Merkel-ia lar sorkari India nem emergency aid agütsütsü atema renemba osang metetdaksüogo.

"India nung alirtem dang Covid-19 wara ajanga ano timtem bentsür aruba atema tebilemtsü khuret abenba lemsateper" ta Merkel-i ashi.

Hokolbarnü France-isa India den khuret lemsatepba osang metetdaksüogo.

"India nung alirtem dang onoki nenok nungiter ta osang metetdaksür. Iba rara nung nenok den France dena lir. Onoki yaritsü renema lir" ta French Ambassador Emmanuel Lenain-i President Emmanuel Macron-i ashiba olen lemsatepogo.

Prime Minister Narendra Modi-i taoba hopta linük den jembidang Covid wara tanabuba ya linük ajunga nung aonba yipru ka lir, ta ashi.

COVID-19 Nagaland: Nisung 180 dak putet

Kohima, April 25 (TYO): Deobarnü Nagaland nung nisung 180 dak COVID-19 putet aser iba ya taküm asoshi nisung timtiba dak putetba lir. Tanü putetertem züngsema nisung ajak agi 13,183 kumogo.

"Tanü nisung 180 dak COVID-19 aliba putet. Parnokji Dimapur nung 154, Kohima nung 24 aser Mokokchung nung 2 lir. Külen, nisung 15 taneptsü nguogo. Parnokji Kohima nung 8 aser Dimapur nung 7 lir" ta Health & Family Welfare Minister, S Pangnyu Phom-i metetdaksü.

Nisung 13,183 rongnungi 12,132 taneptsü nguogo aser tang parnok 679 anepaludar, ta Minister Pangnyu-isa ashi.

"Nagaland nung COVID-19 nungi taneptsü angur 92.02% dang kumogo" ta State Nodal Officer for Integrated Disease Surveillance Programme, Dr Nyanthung Kikon-ia metetdaksü.

COVID-19 puteter nisung 98 asü saka parnok 10 bo tanga timtem ajanga asü. Külen, nisung 272 tashi tanga state temi ogo ta paisha ashi.

Tang anepalurtem rongung nisung 63 dak shirangba yimya terara lir, 19 oxygen agüja anepaludar aser 597 dakbo shirangba yimya kecha mali, ta Dr Kikon-isa metetdaksü.

Nagaland nung COVID-19 alitsü akok ta temolung melemi bilemba sample 1,43,918 tendangogo. RT-PCR ajanga

77,751, TrueNat ajanga 37,934 aser Rapid Antigen Test ajanga 28,233 tendang, ta Dr Kikon-isa ashi.

Deobar tashi nung Nagaland nung nisung 1,43,703 nem covishield indang dose 1,80,473 agütsüogo, ta State Immunization Officer Dr Ritu Thurr-i metetdaksü.

Vaccine agirtem rongnung frontline workers 46,846, healthcare workers 14,060 aser teintet rogo den arishi küm 45 ser temapur 82,797 lir.

Parnok rongnungi frontline workers 22,947, healthcare workers 9,427 aser teintet rogo den arishi küm 45 ser temapur 4,360 tashi vaccine dose anaprong agiogo, ta Dr Thurr-isa metetdaksü.

Arishi küm 18-45 atema Walk-In Vaccination malitsü: Centre

New Delhi, April 25 (Agencies): Arishi küm 18 nungi 44 tsünga alirtemi coronavirus vaccine agitsü atema online registration asütsüla aser parnok atema walk-in registrations malitsü ta Deobarnü Centre sorkari metetdaksüogo.

Deobarnü Union Health Secretary Rajesh Bhushan-i state sorkar tem dangi vaccine agütsüba shilem tasembuba indang teinyaktsütem metetdaksüogo.

May 1, 2021 nungi arishi küm 18 ser temapur ajak nem vaccine agütsütsü aser iba atema April 28 nungi CoWIN website aser

Aarogya Setu app ajanga tenüng agütsütsü akok.

Centre-i frontline workers, health workers aser arishi küm 45 ser temapur nem maneni vaccine agütsütsü.

May 1 nungi nija mozü kitem nung vaccine jenjang atutsü.

April 30 tashi nung nija vaccination centre temi vaccine mamshii aliba ajak meyipa agüjang ta Health Secretary-i tetuyuba agütsüogo.

Centre-isa state sorkartem dang April 30 tashi nung private centre nem vaccine talila magütsüdang, tesüiba nung agüja

aliba vaccine tamasa amshiba asadangang ta tetuyuba agütsü.

Linük nung private vaccination centre shiai CoWIN portal nung vaccine tapu, anünga aliba aser jenjang metetdaksütsü atema shiogo.

Serum Institute of India-i Covishield yanglur aser parnoki state sorkar tem dang Rs 400 aser nija mozü kitem dang Rs 600 agi ayoktsü osang metetdaksüogo.

Ano, Bharat Biotech-i yangluba Covaxin state sorkar tem dang Rs 600 aser nija mozü kitem dang Rs 1,200 agi ayoktsü ta Honibarnü metetdaksüogo.

Centre-i Covid vaccine nung tajangzük agir: Congress

New Delhi, April 25 (Agencies): India nung Covid-19 wara agi tonger kangshiba tiyalong nung Centre sorkari 'Rs 1,11,100 crore' ajangzüker ta Deobarnü Congress-i tai tongloksüogo.

Centre sorkari vaccination policy tamajung yangluogo aser vaccine yanglur nem dose ka jenjang nungi 700% talila agi yokdaksür, ta Congress-i ashi.

"Centre-i India nung lanurtem (arishi küm 18 nungi 45) senzuka yutsür. Parnok nem May 1 nungi vaccine agütsütsü saka dose ka nung sen talila agitsü. Arishi küm 45 ser temapur nem angati mesüra jenjang kanga ajemer agütsüogo" ta Congress spokesperson Randeep Singh Surjewala-i ashi.

"Modi'er sorkar indang vaccination policy ajanga vaccine yanglur ana- Serum Institute (Covishield) aser Bharat Biotech (Covaxin) nem state sorkartem aser nijatem dang ayoktsü

jenjang latettsü tashi agütsüogo. Company anati jenjang kanga meputep latetba osang metetdaksüogo" ta pai metetdaksü.

Serum Institute aser Bharat Biotech company temi open market nung Covid vaccine ayoktsüba jenjang metetdaksüogo.

SII-i yagluba Covishield dose kaji state sorkar dang Rs 400 aser nija mozü kitem dang Rs 600 agi ayoktsü.

Külen, Covaxin dose ka state sorkar dang Rs 600 aser nija mozü kitem dang Rs 1,200 agi ayoktsüba osang metetdaksüogo.

Company anaprongi Centre sorkar dang dose ka nung Rs 150 agi maneni ayoktsü. Centre-i vaccine angati agütsütsü ta ashir saka tangar dang jenjang tasak agi ayokba atemabo kecha mashir.

Nisung kati vaccine dose ana agira Rs 2,400 tashi agütsütsü akümtsü.

Centre sorkari vaccination policy yanglushiba ya opposition party temi aitsür aser parnoki Centre dang "linük ka, jenjang ka" ta asüba nenshia metetdaksüogo.

Linük nung arishi küm 45 ser teküpok alir nisung crore 101 shi ka lir aser parnok nem vaccine agütsütsü atema dose crore 202 shi nüngdaker. Iba ajanga SII aser Bharat Biotech-i Rs 1,11,100 crore shi ajangzüksü, ta Congress-i tanü metetdaksü.

2011 census nung ashiba agi, item nisung crore 101 nungi crore 31 shi ka BPL (below poverty line) nungi lir aser ano crore aika sensakertem lir anungji parnoki vaccine agitsü atema timtemtsü, ta Congress-isa Centre dang shiogo.

India kübok state aika nung aser talisa Maharashtra, Bengal, Jharkhand o Rajasthan ama BJP sorkar maliba state temi nisung ajak nem vaccine angati agütsütsü ta osangtem metetdaksüogo.

Kohima nung World Veterinary Day mungogo



Drill Hall, 4th NAP Thizama nung kinungtsütem aser shiruru meimertem den April 24, 2021 nü World Veterinary Day amungba mapang tangokba noksa ka yangi angur.

Dimapur, Rongchii/April 25 (TYO): Kohima district nung World Veterinary Day ya Drill Hall, 4th NAP Thizama nung kinungtsü aser shiruru meimertem den April 24, 2021 nü munga liasü.

Iba sentong nung Khruosutho, Dy Commandant (OM) 4th NAP Thizama menden liasü aser pai sentong nung adenertem pela agizükba den iba sentong nungi akok tashi shisatsü angazüka kidanger aser lokti balala den lemsateptsü ayongzüka liasü.

Sentong nung okaila jembiba mapang Dr. Rokozo Dolie, Chief Veterinary Officer Kohima ajanga ashiba agi, alima ajunga nung World Veterinary Day ya küm shia April ita nung Honibar tatembangba nung amunger.

Shiruru aser nisung meimchir jenjang tajungba kumdaktsütsü, shiruru asoshi chiyongtsü tajung agütsütsü, tim yimya nung shiruru tesem balala nung belenshia anepaluba tsütsü

Veterinary mapa tali ajungkettsü nükjidong nung iba anogomung ya amunger, ta ashi.

Iba sentong nung Dr. Akangnungla, DDDO Kohima ajanga rongsenketsung tsütsü tongtipang tashidak kar aser item tashidak nungi kumzüksüba lenmangtem, talisa Classical Swine Fever, African Swine Fever, Foot aser Mouth Disease tashidaktem aser azü dak Rabies, Canine Distemper aser Parvovirus azüoktsüba indang rateta ashi.

Nagaland Veterinarians' Association (NVA) tir indang o ya Dr. Keduzol Ltu, Gen. Secy, NVA ajanga zünga liasü.

Sentong nung Dr. Vikuolie Mezhatu, VAS Chiephobozou ajanga "Veterinarian Response to Covid-19 Crisis" onük nung ajemdaker jembiba aser Kohima district nung parnoki inyakba mapa balala indang shisema liasü.

Lockdown mapan veterinary institute ajunga nung healthcare aser veterinary service tem

agüja liasü, district nung aliba Veterinarian aser para-veterinarian temi Meriema aser K. Badze quarantine center nung quarantine mapa inyakba medical staff tem yaria liasü, ta ashi.

Administration ajanga tuyuba ama, Nagaland-i aitiba gari ajunga Interstate Police Check post Khuzama nung sanitize süa liasü, ta pai ashi.

Kohima nung aliba BSL-3 nung yariteptsü atema diagnostic nung takotet Veterinarian tem tenüng bendener ketdangsür nem agütsü aser COVID-19 wave tanabuba tenzüka mapanga kodang südir süaka yaritsü renema lir, ta Dr. Vikuolie-isa ashi.

Iba sentong nung Dr. Ketholenuo Metha ajanga tepela ankep o jembiba liasü. World Veterinary Day anogomung nüngtem nung Thizama nung aliba azü 89 nem Free Anti-Rabies vaccination agüja liasü.

Lokti senden aser benjong mali tajungba: ASD

Dimapur, Rongchii/April 25 (TYO): Ao Senso Telongjem Dimapur ajanga sangdong ka nung Aoli sanger ajak dangi aruya aliba Moatsü benjong salem abener, ta ashi.

Tanü asen lima nung COVID-19 wara tanabuba agi menepa arudagi, anungji nüburtem iba wara tasa nungi

jenbua alitsü mechi lokti senden balala aser benjong-bentsü mamung tajungba asütsü, ta sangdong ajanga ashi.

Mepaidoktetba sentong yangluadoker alirtemia sorkari agütsüba SOP shidak amshia sentongtem agitsü mepishir, ta sangdong ajangasa ashi.

Security Forces temi Nikki Sumi telok nungi züngsem ka apu



Dimapur, Rongchii/April 25 (TYO): Security Forces temi Police den lungjemer Peren district kübok General Hospital Colony, Athibung anasa April 23, 2021 nü operation ka agiba mapang Nikki Sumi telok nungi züngsem ka pua liasü.

Osang tejangja ka nung ajemdaker Security Forces temi State Police den lungjemer operation agiba mapang Nikki

Sumi telok nungi züngsem ka ya apu aser pa ket nungi point 32 pistol ka den magazine, point 32 indang injang ana aser mobile phone ka nguteta liasü.

Ken o maneni bushisüngdangtsü atema pua alisang den pa ket nungi ngutetba osettem Athibung Police Station, Peren District nem agütsüogo, ta sangdong ka ajanga ashi.

Zunheboto nung World Malaria Day amung



CMO Office, Zunheboto nung April 25, 2021 nü World Malaria Day amungba mapang Orenthung, EAC Hq, Zunheboto ajanga telok den jembidang tangokba noksa ka yangi angur.

Dimapur, Rongchii/April 25 (TYO): Zunheboto district nung "Reaching Zero Malaria Target" omen kübok CMO Office, Zunheboto nung April 25, 2021 nü World Malaria Day munga liasü.

Orenthung, EAC, Hq, Zunheboto ajanga sentong nung o tatsüka jembiba mapang merila nungi kumzüka alitsü nung rangloker mapa balala inyaksü indang nükjidong lemsatepa liasü. Pai nüburtem dang mürekmejutsü ajungshi aser iba maparen nung aroki shilem agitsü ayongzüka liasü.

Sentong nung Mudosayi Huire, Consultant NVBDCP ajanga okila o jembiba mapang ramen prokshia aoba indang rateta ashi aser awareness atema nübur ajungai shilem agitsü ajungshia liasü.

Paisa sentong nung adener dang iba tashidak nokdangtsü asoshi department nungi teyari agütsüba indang lemsatep aser merila rizükba ajemdakja ramen prokshiba nokdangtsü asoshi pei aliba tesem temeket müreka ayutsü ayongzüka liasü.

Iba sentong nung Dr. Aron, DTO- RNTCP; Kakugha Jimo,

Vice President, Zunheboto Area Public Organization aser Kato Jimo Vice Chairman-Town GB nungertemia o jembiba liasü.

Sentong nung Tsüngrem temoatsü jazüka Tony, Academic Dean, Nito Theological College ajanga sarasadem, Dr. K. Akaho Sema, CMO cum DVBCD ajanga tepela ankep o jembiba liasü. Iba sentong nung G. Hekuto, Assistant Malaria Officer menden liasü. Iba sentong tembangba sülen IEC osettem alem aser jila nung poster aser banner inoka liasü.

Assam renema lir, lockdown malitsü: Himanta

Guwahati, Rongchii/April 25 (Agencies): COVID-19 tensa azüoktsü mechi state nung lockdown benoktsü menügdak, ta Assam health minister Himanta Biswa Sarma-i Deobarnü ashi.

COVID-19 den raratsü asoshi state nung nüngdak peria lir, anungji lockdown benoktsü menügdak, ta pai ashi.

State nung iba tashidak den raratsü asoshi oxygen, Remdesivir ajem, mozü, tendangba oset den danga nüngdakbatem peria lir, ta Sarma-i ashi.

State nung tangbo lockdown benoktsü tebilemba mali, ta minister-i züngzünga ashi.

Tesüba ghonda 24 tsüngta

Assam nung COVID-19 tashidak nisung tasen 2,236 dak putet aser kasa tashidak yagi nisung 14 asü.

Tang Assam nung COVID-19 agi menepa ajak senteper nisung 2,35,689 jungogo.

Kamrup (M) nung nisung asemasü, Dibrugarh, Hojai, Jorhat aser Kamrup district tem nung ana-na asü. Maneni BARPETA, Sonitpur aser Tinsukia district tem nunga nisung ka-ka asü.

Tang active cases aliba rongnung Kamrup (M) ya temaba lir, kong cases 815 lir, iba sülen Kamrup nung 196, Nagaon nung 123 aser Dibrugarh nung 115 cases lir.

Assam nung COVID-19 active cases ajak agi 14,198 lir.

COVID-19 Task Force Mon ajanga metongshitsür

Dimapur, Rongchii/April 25 (TYO): COVID-19 Task Force Mon pur senden amenba indang osangkaket nung April 22, 2021 nü sangdongba dak sendakba nung, Office of DGP Nagaland ajanga totuyuba agütsüba ama Mon nung aliba police ajunga COVID-19 mozü agitsü, ta metongshitsür, ta sangdong ka ajanga ashi.

Maneni ASHA aser Anganwadi worker shirnoksa healthcare worker ama tenüng zülüoka ali, parnoka iba mozü agitsü atema ajungmesotsü aser Frontline worker ama register masütsü, ta ashi.

Aibelenba atema kanga sasa bilemer, ta sangdong ajangasa ashi.

Mizoram kübok Lunglei nung morok mi adoka lir



Mizoram kübok Lunglei district nung adokba morok mi noksa nung angur.

Aizawl, April 25 (Agencies): Tang India nung Covid-19 wara tanaben adoka tensa mejungi aoba mapang ka nung Mizoram kübok Lunglei district nung lendong balakati nüburtem timtem ajurur.

Lunglei district nung morok mi tulu ka adok aser Lunglei jila den sendaktepa aliba tesemtem nung iba mi agi kongshi tenzükogo.

Morok mi adoker külen nungi ghonda 24 süüigo aser iba mi

lendong azüoktsü atema mi remseperitem kanga timtema inyakdagi.

Kanga dang kara jangruloka aoba mi remseptsü merangba mapang miremseper kar yiru liasü ta osang angazüker.

Deobar anepdang morok mi agi petrol pump ka tera agi dang merongdoktsü. Iba mi lendong azüoktsü asoshi Lunglei tesem nung lisopurtemi mi remseperitem aser sorkar tekolakpurtem nungita yaridar.

Morok mi azüoktsü atema Lunglei district administration-i Air Force teyari meshiogo.

Kasa mapang Mizoram Chief Minister Zoramthanga-ia Indian Air Force (IAF) teyari meshia liasü.

Lunglei district aser sendaktepa aliba tesemtem nung morok mi azüoktsü atema State sorkari mepishiba ama Indian Air Force-i Bambi Bucket aketba 'Mi-17V5' helicopter ana yokogo.

CM Pema-i Covid-19 vaccine agitsü ayongzüker

Itanagar, April 25 (Agencies): Arunachal Pradesh chief minister Pema Khandu-i Covid-19 vaccination atema state nung alir nübur dang tenüng agütsütsü mepishia metetdaksü.

Tesüiba anogo ishika tejakdang nungi Arunachal Pradesh nung Covid-19 kanga menatepa aoba putetogo.

Tesüiba ghonda 24 tsüngda Arunachal Pradesh nung nisung 116 dak Covid-19 positive puteta liasü, ajisüaka iba mapang state nung Covid-19 agi asüba osangbo mali.

Tang state nung Covid-19 puteter nisung 17,546 tashi

kümogo aser parnok rongnung nisung 550 shi tang anepaludar.

Kasa mapang, Arunachal health department-i arishi küm 45 tema tain pur nem vaccine agütsüdar.

Iba den külemi, India nung Covid-19 wara tanaben adokba ajanga nisung million sa million kongshiogo aser Centre-i arishi küm 18 ser temapur tem atema Covid-19 vaccine agitsü melaogo.

Sensopurtemi vaccination atema April 28, 2021 nü nungi tenzuka lenmang asem - advance self-registration, on-site registration aser facilitated Cohort registration ajanga

CoWIN platform aser Aarogya Setu nung register asütsü akok.

India nung Covid-19 vaccine peria maliba ajanga mepetmesü ajuruaka, item küm (arishi küm 18 ser tema) telok atema May 01, 2021 nü nungi vaccine agütsü tenzüksü.

Iba on-site registration mapatong ajanga pei sasa register mesütetertem iba vaccination centre tashi tsüngdong aotsü aser Idangjisa register süa vaccine agitsü asoshi maongka agütsür.

COVID-19 registration atema local administration-i tajangzük angutsüpurtem register sütsütsü.



Assam nung Covid19 wara mapang face mask amshiba indang film tatsüka ka yangluba April 30, 2021 nü 11 buba Dada Saheb Phalke Film Festival 2021 nung sayutsü. Iba film tenüngji 'Mask' lir aser North Lakhimpur nungi Bhawani Doley Tahu-i direct asü. 'Mask' film nung Anjana Das, Niha Gohain, Roshanara Begum, Lakhi Doley, Lipsina Doley, Bistirna Pegu, Liladhar Kaman nungeri shilem agi aser Ponung Karsang Production House ajanga produce asü.

Champai nung kozüjang aser heroin apu

Aizawl, April 25 (Agencies): Mizoram nung Assam Rifles-i Champai District nung kozüjang aika puogo.

Honibarnü Champhai district kübok Champhai-Mualkawi Road nung Assam Rifles indang Serchip Battalion den Customs Preventive Force longjemer telok ka lendanga ataba mapang garitem nung kozüjang bener aliba apu.

"April 24, 2021 nü Assam Rifles indang Serchip Battalion den Customs Preventive Force longjemer General Area Champhai-Mualkawi Rd, Champhai District nung sen lakh 97.67 alang bosta 380

nung kozüjang seper aliba apu," ta Assam Rifles-i Twitter nung metetdaksü.

Ano, Hokolbarnü Serchhip Battalion indang Assam Rifles aser Excise & Narcotics department longjemer heroin gram987.8 densema ozüng alema shibelenba osettem aika apu.

Item osettsüset jenjang sen crore 4 shi asütsü ta aser Champai kübok Zote Kai tesem nungi item oset apu.

"April 24, 2021 nü Serchhip Battalion - Assam Rifles den Excise & Narcotics Department longjemer heroin gram 987.8 densema sen crore 4 alang ozüng alema shibelenba osettem apu" ta Assam Rifles-isa metetdaksüogo.

Küm 30 sülen Jibon Asom-i ULFA-I nungi sodi agir



Jibon Asom (File photo)

Guwahati, April 25 (Agencies): ULFA-I nung tongti lennir Jibon Asom-i küm 30 shi tenzuka aruba sülen kidangi meyipa arutsü telemtetba agiogo.

Jibon Asom-i "medical grounds" nung ajemdaker sodi agitsü asüngdangba ULFA-Independent tanishirtemi agizükogo.

"Tanü April 25, 2021 nungi tenzüker na (Jibon Asom) ULFA-I maparen ajak nungi sodi agütsür" ta ULFA-I sangdong ka nung metetdaksü.

"Na (Jibon Asom) telok nungi akhümketa sodi nguogo" ta ULFA-I-isa ashi.

ULFA-I nung Major General Jibon Asom-i temang nung timtem aliba nung ajemdaker sodi meshi ta parnokisa ashi.

"Pa temang anepalutsü aser kinunger den anisüngzüka alitsü asüngdangba agizükogo" ta ULFA-I sangdong nungsa metetdaksü.

Iba sangdong ya ULFA-I chairman Abhijeet Asom-i agütsü. Jibon Asom-i küm 30 shi ka Myanmar arem nung liyonga aruogo.

Jibon Asom (Jibon Moran) ya ULFA-I nung finance secretary inyak aser pa ya Tinsukia district kübok Uban nunger lir.

Assam-i Bhutan nungi oxygen bener arutsü

Guwahati, April 25 (Agencies): Deobarnü Assam minister of state for health Pijush Hazarika aser Rajya Sabha MP Biswajit Daimary nati Bhutan nung oxygen plant ka semdangogo.

Assam health minister Himanta Biswa Sharma-i tuyuba ama tenati Bhutan kübok Samdrup Jhangkhar tonga ao.

Assam nung nisung aika dak Covid-19 putetba mapang ka nung Bhutan nungi oxygen bener arua amshitsü lenmang bushiteptsü atema Pijush

Hazarika aser Biswajit Daimary na Bhutan-i ao.

Yaküm Covid-19 wara nung lockdown mapang Samdrup Jhankhar nung aliba oxygen plant nung mapa inyakba anena liasü.

"Iba plant yanglushitsü atema anogo 40 shi agitsü aser iba sülen anogoshia oxygen 50 metric tonnes yanglutettsü," ta Pijush Hazarika-i ashi.

India nung tang oxygen peria mangu timtemer aser armed forces-i linük kübok mozü ki balalai oxygen belenba nung yariteper.



TIR YIMYIM YIMOBILEM (EDITORIAL)

DIMAPUR TENTONÜ, RONGCHII (APRIL) 26, 2021

Covid-19 yimtak maitdaktsütsüla

Tesümgangtsü aser bilemdanga kümdangshitsüba kaji, tang ama Covid-19 tashidak wara agi amokmerenba mapang ya temang nung tashidak putetter aser shirangertem ya yimtaklirtem masü saka town nung alirtem dak dang atonger amai putetter. Ashiko, ibaji Covid -19 tashidak wara ya asen lima nung poktetba tashidak ka masü saka bendanglen nungi menatepa aruba tashidak asüba agi asütsüa akok. Tanü putu aser nisunger sobaliba aser mapa yimya agi yimtaklirtem bendangleni kangabo maor saka jila nung alir shishilembartem aser talisa state yimtiba nung alir yimsüsür aser tongti ketdangsertembo aiben bendangleni yimten nungdak aotsüsa akümer. Iba denji ano kaketshirtem aser mapa inyaktertem aika bendang tesem balala nung lidagi. Itemji oli aruli jajadang memeteti tashidak menar aser parnok ajanga tashidak wara ya asen limai bener arur. Yaküm küma bendanglen alirtem meyipa aruba sülen dang asen lima nunga Covid-19 tashidak putettsü tenzük aser taküm küma tayimtsü nung arurtem dak Covid-19 tashidak putet tenzükogo aser train nung arurtem daka aika dak keta alitsü. Aji oda, India nung anogo shia nisung lakh ana asem dak Covid tashidak putetter aser Nagaland nunga anogo shia teimba teimba dak puteta odagi aser joko nisunga asü tenzükogo. Tang tashidak putetertem rongnungji Dimapur nungsa teimba putetter, kechiyong anogo shia bendanglen nungi tayimtsü, train aser gari nung arurtemji teimbaka Dimapur tama atonger aser parnok denji Covid-19 tashidak külemi arur. Tang tashi nung tebilemtsü kaji, tayimtsü nung arurtem dak alaka train aser gari nung bendanglen nungi Dimapuri arurtem dak Covid ali asü maliar kuli meshiba aser tendanga mitba inyakyim kecha mali sademsadema senzüteper. Iba kasa ya anogo ishika ao nungbo, ashiko Dimapur nung alirtem aika dak Covid tashidak wara agi atongtsüa akok. Atangji, Dimapur nung alirtem dang masü saka tebilemtsü kaji, tanga district-tem nunga bendanglen nungi anogo shia arua alitsü aser parnokji kümdangdakja mittsü asoshi district shia inyakyim alitsüla. Ano, ajak dang tekümdangtsü tulutibaji, tanü asüngbo yimtsüngtem nungia kaketshir aser mapa inyaktertem aika bendang tesem balala nung lir, aser parnokji arutsüsa kümra yimtak yimteni tamalen amato parnok anogo tatakzük kabo balaka nung amongtsüsa tang yongi renema atatsüla. Yakanü National Panchayati Raj anogomong sentong nung jembidang, ato kilonser Narendra Modii linük ajaklen yimtak yimtsüngtem nung Covid wara agi matongtsüsa yimteni kanga temulung agüja inyaksüla ta ashiba o ji yimtak tatartemi kanga süoki ia bilema inyaksüla. Kasa tashidak agi shirangersa asüyonga town nung shirangba o yimtak shirangba na balala, kechiyong town nungbo mozü ki lir saka yimtak mozü ki mali, anungji yimtaklirtem asoshibo shiranger asoshi dang masü saka shiranger anepalurtem senzütsü aser anentsü asoshia tebilemtsü aser timtem aika lir. Ano, shisabolutsü kaji kasa nüborsa asüyonga yimtak o town nung alirtem na sobaliba balala lir. Town nung alirtembo aika kisemtsüsemba sobaliba mali, anungji kidanger aser kiyongertem tsüngda tashidak melamelaabo menatepa maor saka yimtakbo kibokksem melira jangramatem aser sobaliba memetet shisanger, anungji nisung kati yimra manga menar arununga, aji kidang kiyonger aser yimtak külemi alirtem dak menaloktsütsü onsara temela aser zübazübar. Iba amaji kodang Covid-19 tashidak wara ama agi yim tongdir, manger sangwa nung yim ajak asüngtsüa kecha meteta maka. Item ajakji shisadanga yimtaklirtema kanga rongdaknüngdak melira yim among adena bendangleni maotsüla aser bendanglen alirtema yimtaki mao ata tajungba. Iba jagi asenoki memeteti asen taküm dang masü saka asen nübortem taküm kümzüktsü.

OLEMSABANG

NABOT LUNG AGI ONSETA SÜDAKTSÜBA AMA DELHI NUNG ALUYIMERI AJURUR

~ Wati Longchar, Serampore

(Yashi adok nungi...)

Tazüngba makara ashiochtsütsü temela. Maparen balala ajak nung aluyimer dang ochi meshi-i benshia aruba kuli aika lir. Küm aika tejaklen nungi aluyimertem nem tim taah magütsür, parnoki züsentetba shishilembatsü ozüng takang ka maliba ajanga, tetsüngda nisungtemi (middle men) aiben ashiochtsüba ajanga parnok kechi tim tangutsü lir aji mangur; kibong memesüteter; sentsüh khuret taliang kümdaktsür. Ozüng takang ka nungdaker, saka tanü koba ozüng asem yanglur, iba ya BigBoss, tetezü cooperate tulu, business tulu akar dang ajangzüktsü. Ochimashi mapa inyakra, Cooperate anema aluyimertemi kecha court nung temeten bushitsü memelatsü. Tat. agi., "No suit, prosecution or other legal proceedings shall lie against the Central Government or the State Government, or any officer of the Central Government or the State Government or any other person in respect of anything which is in good faith done or intended to be done under this Act or of any rules or orders made thereunder." Iba ama ozüng yabo dictator lima nung dang amshir, democratic lima nung yamaji ozüng yanglubaji tim masü ta tejashi ola adokdaki. Government nung tekolak ishika aser Big Business Cooperate ishika som sür aluyimertem ayoktsü aser ashiochtsütsü ozüng ta ajaki ola adoker. Iba ozüng kodang mapa kümdir Cooperate tului ali ajak agiadoktsü. Taoba mapang Cooperate-i ali kibur nem mapang shitak nung sen magütsüba, parnoki züsentetba majung anungji magitsü ta tiyazü shia ashiochtsüba ama inyaksü. Tat. agi., sugarcane industry aika nung kiburi sen magütsü aser tatem nungbo aluyimertem sentsüh yong ali agiadokba otsü lir. Ibala ochimashi temzüng, takar atsünga yangluba agi India nung nübur aika ali maka tanü tashi lir. Kasaji ataloktsü ta sensena bilemer. Alima ajak nung aluyimer ashiochtsüba, parnoki züsentetba rakzükba, ali agiadokba aser parnok lu nung alar amai kümdaktsüba otsü aika dang lir. Shilu aika, caste system aliba lima ka nung dalit, tribal aser ali tilala akar ajak pei lu nung alar kümdaktsütsü ozüng, anungji magizüktsüla ta lenir aikati ashir.

Aluyimer Nabot Lung agi onseta südaktsüba otsü

Tang Samaria chuba Ahab chuba ki anasa Yezreel nung Yezreel nung Nabot ket nung tsükmenatzü lu ka liasü. Aser Ahab Nabot dang asüngdang, "Atsüki ka yanglua tsünüsembongtsü adokdaktsütsü asoshi ne tsükmenatzü luji kü nem kua, kechiaser ibai kü ki anasa aser iba dangi tajungba tsükmenatzü lu ka mesüra ni ne nem sen agütsüdi." Naboti Ahab dang ashi, "Kübu senmang ne nem agütsütsüji KIBUBAi nungtemer."

Ahab pei kidangi temulung kanga mepelai meyipa aru, kechiaser Yezreel nung Naboti kü lu senmangtem ni ne nem magütsütsü ta pa dang ashi; aser pai pei yipten nung metaloker pei tejak nembanger kecha machi. Saka pei kinungtsü Yezebel arua pa dang ashi, "Kechi agi ne tanela jashidaktsür, aser kechiba nai mechiyonger?" Pai la dang ashi, "Yezreel nung Nabot dang ne tsükmenatzü lu sen agi alidi ta ni asüngdang, mesüra nai mulungra tanga tsükmenatzü lu ka agütsüdi ta ni ashi, saka pai ni ne nem kü tsükmenatzü lu magütsütsü" ta ashi. Pa kinungtsü Yezebeli pa dang ashi, "Nai Israel yimli madak tang yimsü masür ama? Aramesoang, arung, chia-jema aser na pela-a liang. Yezreel nung tsükmenatzü luji ni ne nem agütsütsü."

Anungji lai Ahab tenüng nung Nabot aliba yimti nung alir tamburtem aser tamarenertem dangi shiti zülur kanga junga pa nüng zülü aser kanga junga nembanger yok. Lai shiti nungji yamai zülü, "Nübur ajak telumiba anogo ka sangdongang aser Nabot tenem ka nung jukteta mendakjang. Pa anasaji samesa nisung ana mendakjang aser pai Tsüngrem aser chuba anema atakatemo go ta tena nem kuli südakjang. Iba sülenji pa lung agi onseta südakjang." Yimti nung alir teloki, tamburtemi aser temerangertemi Yezebeli shiti nung zülüa parnok dang ashiba ama parnoki inyak. Aser parnoki nübur ajak ayongten aser nisung ajak madang Nabot tenem nung mendaktsü. Aser samesa nisung ana pa anasa amen, aser Nabot anema nisungtemi angashia noktaka kuli ashi, "Naboti Tsüngrem aser chuba atakatemer." Idangji parnoki pa yimti nungi atsür adoka pa dak lung agi ona pa onseta südaktsü. Idangji parnoki Yezebel dangi osang yoka ashi, "Nabot lung agi onseta südaktsüogo." Kodang Yezebeli Nabot lung agi onseta südakogo ta angashia, Yezebeli Ahab dang ashi, "Aramesoang aser Yezreel nung Nabot tsükmenatzü lu koba pai sen yong magütsüli ta ashi aji agiang; kechiaser Nabot taküm mali, pa süogo." Kodang Ahab Nabot süogo ta angashi, Yezreel nung Nabot tsükmenatzü lui pai ao aser aji pai agi.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Armenia nunger Khristantem jenti tepsetba sülen küm 106 jungogo



Akhidang Armenia nunger Khristan jenti tepsetba sülen küm 106 ajungba anogo- April 24, 2021 nü France nung alir Armenia nungertemi Paris yimti nung longkak aitba noksa nung angur.

April 25, 2021: Armenia nunger Khristantem jenti tepsetba aser Armenia nunger 600,000 nungi 1.5 million tashi jenshiba tatalokba sülen April 24, 2021 nü küm 106 jungogo, ta International Christian Concern (ICC) osang ajanga metetdaksü.

1914 küm Armenia nunger million 2 shi Turkey (tang Turkey linük) nung liasü. Tanübo parnok meyrjang menden nung dang lir saka maneni Turkey ketdangsertemi parnoki akhi nüngshi kiojentem samatsütsü meranger.

1915 küm April 24 nü nungi tenzüka (official) Turkey

sorkari Armenia nunger Khristantem aika apu aser noklang aika tepseta liasü. Iba sülen nungjagi tenzüka Turkey linüki asalentong yanglur Armenia nunger jenti tepseta liasü.

Iba mapatong kübok Armenia nunger dang masü saka Greek nunger aser Assyria nunger ama lisopur Khristantema aika tepseta liasü, aser ibaji Khristantem meshimeshi samatsütsü nükjidong nung inyak ta bilemer.

Kasa mapatong kübok tanurtem aika Khristan yimsü dangi meypdaksü aser Turkey

nunger kibongtem nem agütsü; parnokisa Armenia nunger Khristantem meyong kiojen rakzük, labor camps nung ayu aser nisung jenti tepseta liasü.

Tang tashi Armenia nungeri alima linüktem dang parnok jenti tepsetbaji atangji, ta agizükdaktsüner. Talisa tawa Nagorno-Karabakh (Armenian: Artsakh) war sülen parnoki alima linüktem dang ibaji atangji, ta agizükdaktsüner.

Tang-a Armenia nunger aika maneni reshikangshi aser amokmeren tia nung lir, aser parnoki tarutsü atema tebilemtsü akar.

India nung Khristantemi May 7 nü Covid wara atema sarasademtsü

April 25, 2021: India nung Khristan lenirtemi Khristantem dang coronavirus wara nokdangtsü atema tetuyuba balala benschitsü atema ayongzükbä den külemi linük nung iba wara prokba anentsü atema May 7 nü sarasademtsü ayongzükgogo.

Mumbai nung Catholic Bishops' Conference of India Tir, Oswald Gracias-i shidi ka ajanga putirtem dang linük nung iba wara prokba anentsü atema Tsüngrem dang teyari meshia May 7 nü sarasadem sentong ayongzüka agitsü metetdaksü.

April 22 nü pai züluba shidi nungji yamai shia lir, "Tang anogo shia linük nung nisung 300,000 shi dak coronavirus puteta arudar. Wara tanaben prokshiba ajanga tsunami lendongi kongshiba ama asenok kongshiogo aser iba dang nungjagi tamajungba akümtsü."

"Asalentong majungba den külemi hospital tem nung yipten peria mali, antiviral mozü aser vaccine peria mali. Iba tensa ya ano tamajungba akümtsüa akok," ta pai metetdaksü.

Putir, Gracias-isa nüburtem

dang mask agiba, nisung tesüngda tetsüngda itta aliba, teka metsükba ama Covid anema teuyubatem benschitsü aser wara prokba nokdangtsü atema ketdangsertemi tuyuba ajak tashi angaa benschitsü mepishia metetdaksü.

Khristan lenirisa ajak dang coronavirus vaccine agitsü ajungshi.

April 23 nü osangbener den jembidang Indian bishops' healthcare commission nung Chairman, putir Prakash Mallavarapu-i, "Tang ama mapang ka nung asenoki tsükchir (wara) anema longjemer raratsüla, tang mapang ya tai tongloksüteptsü mapang ka masü. Tang linük nung tensa tamajung ka asenoki ajangshidar aser anogo shia iba tashidak agi shiranger aika südar," ta metetdaksü.

"Tang linük nung medical facilities agi meperir, anungji nüburtemi coronavirus anema tetuyuba balala shidak benschitsüla," ta paisa ashi.

"Tang asen nüburtem südar. Asenok ajak longjemer sorkar aser tanga agencies den amteper iba wara anema raratsüla," ta Khristan lenirisa

metetdaksü.

Osangkaket balala ajanga ashiba agi, local administration balalai coronavirus tashidak agi asürtem züngdangba kanga ajema metetdaksür.

India nung Supreme Court-ia iba wara tanaben prokba ya "national emergency" ka mesüka lir, ta shia Centre sorkar dang iba wara anema asalentong metetdakjang, ta tuyuogo.

Osang angazükba agi, India linük nung coronavirus tashidak agi shirangertem jenti alitsü, kechiyong iba tashidak temaitsü keta alir aikati iba tashidak metendanger mesüra iba tashidak temaitsü keta alirtemi hospital-i maor.

April 23 aonunga Delhi nung aliba hospital ka nung oxygen peria maliba agi coronavirus tashidak agi shiranger 20 süogo; yamaji nija hospital aika nung oxygen maliba agi coronavirus tashidak agi shirangertem aika südar.

April 23, 2021 nüa India nung nisung 3,32,730 dak coronavirus tashidak puteta liasü aser iba tashidak agi nisung 2,263 asü.

ANOGO ABEN TSÜNGREM DEN

Ain adokba mali

"Saka ni ijip lima nungi Kibuba ne Tsüngrem lir. Parnok atsüngzüka aoba ni aneptsütsü, ni parnok angati dang meimtsü; kechiyong kü ain adokba pa dang nungi meypa ogo." Hosea 14:4

Asen Tsüngrem taochi agi sünga aliba Tsüngrem. Pai asenok odang meim, pai asenok taochi agütsüa tatok agütsüba taküm ka lir. Israel otsüji dang masü saka tanü na aser ni temenen nisung, tamanger süaka kibuba ajungbai ama taküm meliteter aser mesayuteter. Asen tashi mait khen bilemdangdi anema toktsü sür nung tekülem-i arua Pa külemtsü makoker. Saka asen nüngdakbo koma ka mazüngaka inyaker. Asen nüngdak aginü dang oh Kibuba ta ajar saka züba- züba dang pelarako ta Tsüngrem dang mashir. Tila ka dangji, mesüra yabo kecha masü ta dang temenen inyakpet dang inyaka jajaba khristanten aika lir. Aseni inyakba yaribo atakatem aser temerenshi aru langa lir. Pai asenok ajak aneptsütsü asen tashi mait Kibuba dangi bendi arung.

Sarasadem

Kibuba nai onok odang meim nung pelar, Nai ni agizükangma, ni ne dangi arur. Amen

Algeria nung pastor ka tepuokdak küm ana ayutsü obendang agütsü

Algiers (Algeria), April 25 (Agencies): Algeria nunger pastor ka aser pa den yaritepa inyaker ka na küm aika tepuokdak ayutsü obendang agütsüba anema temepishiba ken o ka angadangba sülen tena pusemertemi Khristantem dang tena atema sarasademjang, ta metetdaksü.

February 27, 2021 nü Pastor Rachid Seighir aser Nouh Hamimi na küm ana tepuokdak ayutsü obendang agüja liasü. Tena indang bookstore nung Khristan kakettertem ayokba ajanga Muslim nunger tamang anokshitsür, ta aija tena tepuokdak ayutsü obendang agütsü.

Pastor anema obendang ka agütsüba sülen 2017 küm September ita nung Arogoi lapokba bookstore ji mita ao. Iba obendang anema temepishiba ken o ka agütsüba April 18, 2021 nü angadangtsü sentong liasü saka May 16, 2021 tashi atsülangogo.

Muslim nunger nütsüng timba aliba linük nung pastor aser par Arogoi küm aika timtem ajangshia arudar. 2008 küm nunga Pastor Rachid iba ama ken o ka nung tai tonglokja liasü saka pa anema kuli mengui chiok.

Ajisüaka 2017 küm nungbo state governor-i bookstore ji shibangang ta tuyu. Iba dak alia 2019 küm tatembanglen Oran nung aliba Pastor Rachid'er Arogo- Oratoire Arogoa shibangdaksü.

Pastor Rachid Seighir aser

Hamimi na pusema Voice Of the Martyrs Canada (VOMC)-i Khristantem dang tena atema maneni sarasademjang, ta mepishia metetdaksü.

VOMC-i, "Court nung ketdangsertem melungjang nung Tsüngremi jembiang ta asenoki sarasademtsüdi. Asenoki sarasademtsüba ajanga tepuokdak alirtemi taochi angutsü aser chioktsü," ta metetdaksü.

"Tepuokdak aliba Khristantem dang masü saka parnok kinüngertem aser tamangertemi tang ama tensa ka nung Tsüngrem aliba ajangshitsü atema asenoki sarasademdi. Court nung maneni iba ken o angadangba mapang nung parnoki tashi tasen angutsü, timtem majurutsü aser pei tamang jenjang ajanga temelung ulushitsü atema asenoki sarasademtsüdi," ta VOMC-i metetdaksü.

Tang Algeria linük nung nütsüng million 43.3 lir aser iba nungjagi Khristan nütsüngbo 1,29,000 shi dang lir, ta Khristantemi metetdaksü.

Algeria nung Khristantemi timbaka Islam yimsü nungi meyipertem lir aser parnok aikati reshikangshi ajangshidar.

Khristantemi ashiba agi, tang Algeria Tir, Abdelmadjid Tebboune-i 2019 küm December ita nung Tir election nung takok anguba sülen linük nung temelenshi aika bener arutsütsü nangzüka liasü, saka tang tashi linük nung Khristantem kanga timtemer.

OLONG PAITEP # 5793

1				2					3	
						4		5		
6			7							
					8		9			10
11										
12		13					14			
		15								
						16				
	17									
					18					

TIPIEN

1. Yakob tetsü - (6)
4. Mezüing nisung - (4)
6. Tasen lai kakat ka - (5)
9. Au lanu - (2)
12. Tejen lai 21 buba - (11)
15. Tekolak tembar - (2)
16. Zütsüra anepsang - (5)
17. Kain tenu - (4)
18. Hana-er jabaso - (6)

LANGTSÜNGLEN

2. _ _ _ gki - (3)
3. Telungpur telok ka - (2)
5. Tsüngremi mezüing poktetdaksüba - (5)
7. Tia - (4)
8. Yakob-er jabaso ka - (5)
10. Abraham tebutü - (4)
11. Rebeka kinungpu - (4)
13. Esau tenu - (5)
14. Tzünglu tilala aru - (4)
16. Jafet tebu - (3)
17. Teka agi kongshi - (2)

OLONG PAITEP # 5792 TELANGZÜBA**TIPIEN :**

1. Tesangra, 5. Mungo, 7. Kisen,
8. Salem, 12. Semki, 14. Kilem,
15. Kensü, 16. Sangpang.

LANGTSÜNGLEN :

1. Temesen, 2. Raksa, 3. Aon, 4. Aso,
6. Nile, 9. Alizüing, 10. Omen,
11. Lemta, 13. Ola, 14. Kin.

**METETNÜA ASÜNGDANGER**

- Q1. Yongjak yagi kechi nungsa yarir?
Ans: Kanga junger. Iba yagi tepok kanga junga odaksür, B.P ajemdaksür, poknüng ajak nung teyari agütsür, saka pabo nisung (or) meimchir yimya den kenyongi balala.
- Q2. Aree kechi nung meimchir den balala ta aji? RATETJANG.
Ans : Pabo teküpjibo tako saka aji okdokerbo tanüingba ajakji tajungdang. Saka meimchirbo tema nungbo tajung, saka poknüngbo tako agi sünga alir teimba.
- Q3. Oooh!! süra asen lokti ya poknüng majungba agi raksar ati na ya. Süra ano shidakba nung RATION CARD ya shirnok atema central govt-i agütsür?
Ans : Yaa shidakbabo sensaker, lene maor, tarulen kecha leman malir atema agütsüba temeim leman ati. Saka ochi nung sensaker tiyazü külakküpong ochi mashi nung takar ta asüba agi sorkar telong nung pazü mepetdangtet ama aruba ya agi kangshir atihe. Pei sasa ya tai ta mangatet tashi asen limabosa majungtsü.
- Q4. Aya-a bilemdangtsü khuret tulu lir nee. Süra ano kar asüngdangti. Naga nunger ya nüchiso kodang angutsü ya?
Ans : Yabo masüngdangtsüla ka asüngdangti. Saka ya ati, onok parnok, nenok ta masü saka asenok ajak temeim nung asenok ajaki pei lima aser tarutsü lanurtem atema tazüingla kuma ajak aremzüker mapusora ajak azüteper laotsü aser asen lima ayatai tai ai tsü. TAX LAND, SARU SAJI LAND oda oda alima yimya ama Corona-a tsübur, telok balala-a tsübur ta asen lima ya MANGSA LIMA akümtsü asüna-a ta shisabulura nee.

Lilir : N. Saku Imsong, 4th Mile Diphupar Dimapur

AO OSHI ANGAZÜKDAK:**TANÜ ANGAZÜKTSÜBA OJANG****Benden**

(v) aika bener arua ayu (collect / add)

* Takarsangi rongsen aika **benden**.**Benja**

(v)minprongdaksü / jangjungmara (confuse)

* Lokti senden nung nisung ka yi jemer arua kanga **benja**.

Tir Yimiyim

NAI-A YA METETTER MA?

Scientist team kati Meghalaya nung 'disk-shape' mesük tetsüing temena aliba lah tapu ka ngutet. Iba lah tapu ya India nung mezüing alitsü. Meghalaya nung ngutetba lah tasenba densema tang India nung yimzüba shiruru (mammal) 130 tashi kumogo. Item yimzüba - mamatzü ayongba shiruru 140 rongnung shiruru 66 tashi Meghalaya State nung angur. 'Eudiscopus denticulus' ta scientist temi nungja agütsüba lah ya au (Bamboo) dong/terong nung alir aser Meghalaya indang Nongkhylllem Wildlife Sanctuary tsütsü Lailad yimtsüing nung iba lah nguteta liasü.



Eudiscopus denticulus

TANÜBO NAI LANGZÜANG**Q. Koba kum Uchhatar Avishkar Yojana tenzük?****A.2010****B.2015****C.2013****D.2017**

===== (Taruba adok nung onoki langzütsü)

YASHI ADOK TELANGZÜBA : 24 October 1962**SUDOKU # 5836**

	5		6		2	3		8	6	1	4	9	5	8	7	2	3
		3					9	4	7	8	3	1	2	6	5	4	9
9	8			3		1			2	9	5	7	4	3	1	8	6
	4	7		1			8	3	3	6	1	2	9	4	8	7	5
	6			2			5	8	2	7	5	6	1	3	9	4	
5				4	9		2	6	4	5	9	3	8	7	2	6	1
3		2		6				1	5	7	6	4	1	2	9	3	8
4		8		7	3	5	6		1	4	2	8	3	9	6	5	7
6	9			8		2		7	9	3	8	6	7	5	4	1	2

TELANGZUBA # 5835**OJANG LUTEP # 5379**

TETIMM	:						
AGIMI	:						
OKTAK	:						
NGDA	:						
INÜAGA	:						
AKBINYA	:						
SATSSHIÜ	:						
YONKHENGI	:						
OKTINDSÜ	:						
ANGAMERNG	:						

OJANG LUTEP TELANGZÜBA # 5378TEBILEMBA MATONG YUR TEZÜ ATANGBA AJANGA
ANOJUNGI SENTONG AJUNGA RAKSADOK**TAN HOPTA ATEMA - KOMA SÜLA ?**

- Q. Covid-19 tashidak wara agi senzusenpong aser lokti senden senteptsü mesademi akümba mapang ya arogo ajak nung aonung shia online Bible Study (Lai bushiba mapang) sentong ka tenzük nunga koma süla ?

Olong 20 shi nung April 30, 2021 tashi nung iba telangzüba ya onok dangi (e-mail - tiryimiyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzübatemji taruba Honibarnü adoktsütsü.

Tanü West Bengal nung assembly menden 34 atema election agitsü



Kolkata, April 25, 2021: Hombarnü West Bengal nung assembly election shilem 7buba agitsü lia Amongnü Kolkata nung Polling officials-i Electronic Voting Machines (EVM) bener parnok ataba tesemi aotsü lia tangokba noksa nung angur.

New Delhi, April 25 (Agencies): April 26, 2021 nü West Bengal nung assembly election shilem 7buba agitsü; tesüiba anogo ishika tsüingda stae nung coronavirus tashidak kanga prokba nung ajemdaker voting mapang coronavirus anema tetuyubatem shidak benoktsü.

West Bengal nung assembly election shilem 8 lemsar agir aser shilem 7buba nung assembly menden 34 atema candidate ajak agi 284-i tokteptsü. Iba shilem nung vote agütsütsü temsüa alir lakh 86 dak tema lir.

Menden 34 ya Murshidabad, Paschim Bardhaman, Dakshin, Dinajpur, Malda aser Kolkata districts kübok lir aser item districts kübok Polling station 12,068 nung election agitsü.

Taoba election nung Chief Minister, Mamata Banerjee-i Bhabanipur constituency nungi

takok ngua liasü ajisüaka tan election nungbo lai Nandigram menden nungi toktepogo.

Hombarnü Bhabanipur menden nung TMC lenir aser state power minister, Sobhandeb Chattopadhyay-i tawa TMC toktsür BJP nung adensang, Rudranil Ghosh den tokteptsü.

Honibarnü West Bengal nung nisung 14,281 dak coronavirus tashidak putet aser nisung 59 asü.

April 10, 2021 nü West Bengal nung assembly election shilem pezübuba agidang Cooch Behar nung nisung pongu asüba sülenbo security tali akangshiogo, ta Amongnü Election Commission ketdangser kati metetdaksü.

Election shilem tenetbuba nung EC-i Central sepai company 796 lezmüksüogo, aser ibaji mepetmesü nokdangtsü

aser election tesünep nung agitettsü atema lir, ta paisa ashi.

Coronavirus tensa tamajungba akümba nung ajemdaker EC-i tenokdangba kar benokba ajanga election shilem tenetbuba atemabo party balalai nüboyim sentong junga magiteti liasü.

EC-i state nung roadshows nokdangba den külemi lokti senden nung nisung 500 dak tali madenshitsü tuyuogo.

State nung Murshidabad district kübok Samserganj aser Jangipur menden nungi tokteper candidate anabo coronavirus tashidak agi süogo, ibayongji election thinena May 16 nü ang menden ana atemaji election agitsü.

April 28 nü West Bengal nung election shilem tatembangbuba agiba sülen May 2 nü votes zünga election osang sangdongtsü.

Covid wara anema raratsü asoshi US-i India sorkar yaritsü

New Delhi/Wilmington, Rongchii/April 25

(Agencies): Tang India nung coronavirus tashidak kanga prokba agi United States-i kanga tebilemtsü katsür, ibayongji iba wara anema raratsü atema US-i India sorkar aser health care workers yaritsü, ta White House nungi otongdar tetsür kati metetdaksü.

"Onoki temaba jenjang nung o lempedar aser tang iba wara ano tanaben prokba mapang iba wara anema raraba nung India sorkar aser Indian health care workers yaritsü atema onoki sentong yangludar," ta lai email ajanga osangbener nem metetdaksü.

US nungbo vaccine 'demand' ajema kümogo aser vaccine aika rizünga lir, ajisüaka America-i tangar meyarir, ta America nung aikati aitsüba mapang nung US-i India yaritsü osang ya sangdonger. India linüki tang teyari kanga nüngdaker ajisüaka US Tir, Joe Biden-i aniba sorkari teyari magütsür, ta aikati ola adokba mapang nung iba osang ya sangdongogo.

Tang India nung anogo shia nisung lakh 3 tema dak

coronavirus puteta arudar, hospital tem nung yipten agi matar aser oxygen agi anüngba agi nisung aika südar.

India sorkari linük tesem balala aser Singapore densema bendang linük balala nungi oxygen Delhi-i bener arutsü atema sepaitem indang tayimtsü aser train lezmüksüogo.

Nütsüng billion 1.3 aliba linük nung tang iba tashidak agi teshirangdakpur 26,82,751 kümogo.

Washington nung aliba Indian Embassy nung otongdar kati-a, "Teyari supply agütsütsü aser India nung covid vaccines yangluba nung US company temi yariteptsü atema linük anaprongla (US-India) nungi ketdangsertemi jembidar," ta metetdaksü.

Amongnü osangbener den jembidang Indian Embassy nungi otongdarisa, "Medical supply chains atema aser tayongzükba balala koktettsü atema jembidar, iba denji külemi longjemer alima wara anema raratsü aser vaccine agütsüba maparen tekaraba nung inyaksü atema longjemer inyaksüji kanga tongtibang," ta metetdaksü.



April 25, 2021 nü Kanpur (Uttar Pradesh) nung aliba LLR hospital nung yipten agi meperiba agi coronavirus tashidak agi shirangertem hospital corridor nung treatment agiba noksa nung angur.

Arrshi küm 18-44 purtemi vaccine agitsü atema CoWIN nung register asütsüla

New Delhi, April 25

(Agencies): Arrshi küm 18 nungi 44 tsüingdapurtemi coronavirus vaccine agitsü atema pei sasa CoWIN portal nung register asütsüla aser appointment yanglutsüla, ta Centre sorkari metetdaksü.

Immunisation centres nung nisung menungteptsü atema centre-i indangindanga arua vaccine agitsü memelatsü, ajisüaka arrshi küm 45 nungi temapurtemibo maneni centre-i arua indangindanga vaccine agitettsü, ta sorkar ketdangsertemi metetdaksü.

Tang linük nung coronavirus tashidak kanga prokba mapang nung Centre sorkari May 1, 2021 nungi tenzüka arrshi küm 18 ser temapurtema vaccine agitsü melaogo.

Arrshi küm 18-44 purtemi April 28 nungi tenzüka CoWIN platform aser Aarogya Setu App nung register sütettsü aser vaccine agitsü mapang nung documents agütsütsüla.

"Vaccine agitsü atema kodang ajak nem maongka agütsüdir

nisung kanga nungteptsü, anungji lokti azüoktsü atema arrshi küm 18-44 tsüingdapurtemi vaccine agitsü aser appointment yanglutsü atema CoWIN portal nung register asütsüla. Lokti nungtepba nokdangtsü atema centre-i indangindanga arua vaccine agitsü memelatsü," ta ketdangser kati metetdaksü.

Liberalised Pricing & Accelerated National COVID-19 Vaccination Strategy ajanga ashiba agi, sorkar vaccination centres nung COVID-19 vaccination ji maneni angati agütsütsü aser vaccine angati angutsü temsüa alirtemji healthcare workers, frontline workers aser arrshi küm 45 aser temapurtem lir.

Vaccine yanglurtemi supply shilem 50 atema jenjang jelia sangdongtsü aser May 1 matongdang nungi state sorkartem atema open market nung angutsü. Jenjang latetba nungi ajemdaker states, nija hospitals aser industrial establishments-i vaccine ji manufacturers nungi mangatsü.

India nung ano nisung lakh 3.49 dak Covid putet aser 2,767 asü

New Delhi, April 25 (Agencies): India linük

tesem ajungalen coronavirus tashidak prokba mazüokteti tanaben prokshiba mapang tesüiba ghonda 24 tsüingda ano nisung 3,49,691 dak coronavirus tashidak putetogo aser nisung 2,767 süogo.

Tang linük nung coronavirus tashidak agi teshirangdakpur 26,82,751 lir aser iba tashidak agi tang tashi nung nisung ajak agi 1,92,311 süogo, ta Amongnü anepdang

Union Health Ministry data ajanga metetdaksü.

Tanü tashi nung India nung nisung ajak agi 1,69,60,172 dak coronavirus putetogo aser iba nungjagi tang teshirangdakpur shilem 15.82 lir.

Linük nung iba tashidak agi shiranger anepba shilem ano tajemba küma 83.05 dang kümogo aser iba tashidak agi shiranger asüba shilembo 1.13 dang kümogo.

Indian Council of Medical Research (ICMR)-i ashiba

agi, April 24 tashi nung samples ajak agi 27,79,18,810 tendangogo aser iba nungji Honibarnü samples 17,19,588 tendangba densema lir.

Tesüiba ghonda 24 tsüingda iba tashidak agi asür 2,767 nungji Maharashtra nung nisung 676 asüba, Delhi nung 357, Uttar Pradesh nung 222, Chhattisgarh nung 218, Karnataka nung 208, Gujarat nung 152, Jharkhand nung 110 aser Madhya Pradesh nung 104 asüba densema lir.



April 25, 2021 nü Agra nung aliba hospital ka kima coronavirus tashidak agi shiranger tetsür oxygen agia ataba noksa nung angur.

Baghdad mozüki ka nung mi adok; nisung 82 asü



Baghdad, Rongchii/April 25, 2021 : Ibn al-Khatib Hospital mi lendong nungi jenbur shiranger ka Baghdad, Iraq nung aliba mozüki danga kati April 25, 2021 nü anir aoba noksa nung angur. Ibn al-Khatib Hospital nung coronavirus agi menepa alir anepaludak kitsük-kirong lendong tulu ataloka nisung 82 asü aser 110 yiru, ta Iraqi Interior Ministry ajanga Deobarnü ashi.

Baghdad, Rongchii/April 25 (Agencies): Oxygen tank ka apokba ajanga mi adokba sülen Baghdad nung mozüki ka nung nisung 82 asü aser nisung 110 yirua liasü. Iba mozüki ya Covid-19 agi shirangertem anepalutsü atema renemer liasü, ta Interior Ministry otongdar kati Deobarnü metetdaksü.

"Tarutsü nung iba amala tejashitsü lendong mataloktsü atema mozük ajak nung teküzmükba jenjang agiba tangsa tang asadangshitsü nüngdaker," ta otongdar Khalid al-Muhanna-i state television dang ashi.

Mi ya Honibarnü Diyala Bridge anasa Ibn Khatib hospital nung adok.

Iraq indang semi-official High Commission for Human Rights züngsem Ali Bayati-i, taoba mapang lendong nung asürtem mejangja saka nisung 30 nungi 45 shi sür alitsü ta

metetdakja liasü.

Mi adokba sülen mozükidang tema anepalua alir kinungertemi pei temeimbater kümzüksü meranga liasü.

Nisung kati ashiba agi, mi nungi jena aotsü atema nisungtem kichiba nungi pongshia liasü.

"Mi totzü ama prokshia ao. Ni kü adianu checkpoint anasa kimai anir tugu. Iba sülen ni meyipa aru. Ni tatabangbuba floor-i atu, koba merongi liasü. Iba floor nung ni aiür chanu ka (küm 19 shi) tangola masapoine angu aser la tasür dang laisü," ta Ahmed Zaki-i ashi.

"Ni la kü tapubang nung ponglok aser asemzüka alu. Nüburtem jokshia liasü.. doctor tem gari nung lua tsük. Nisung ajak pongshia ajen. Ni maneni ki temalen tua nisungtem anir alu," ta Zaki-i ashi.

Shirangertem tanga mozüki-i anirogo, ta medical source kati

ashi. Ajisüaka mi temsepba sülena kibongtem aika mozüki metoktsü liasü.

Ato Kilonser Mustafa al-Kadhimi-i ken o bushitsüngdangtsü atema tetuyuba agütsüogo.

"Mekümdangba ajanga iba amala lendong ataloker anungji ni tangsa tang ken o bushitsüngdangtsü teyur, aser aibelener mapu tashi iba dak sendaka alirtem den hospital indang manager, security tekolakba aser maintenance achaayangertem sota yua atang," ta pai ashi.

Alima nung COVID-19 mozü billion 1 dak tema agütsüogo

Rongchii/April 25, 2021 (Agencies): Alima nung COVID-19 mozü doses billion ka dak tema agütsüogo aser yanghi shilem asem dak tema linük asem kisüing nung agüja lir, ta asadangteta lir.

Alima nung nüburtem nem COVID-19 mozü agütsü tenzüker ita pongu mejungi Honibar aonung 10:45 ako tashinung linük aser territory 207 nung iba mozü doses 1,002,938,540 agütsüogo, ta AFP news agency ajanga asadangtet.

Honibarnü alima nung nisung 893,000 dak tema iba tashidak agi meneper lia iba alizüing ya tongtet.

Mozü ya doses shilem 58 bo linük asem kisüing nung kisüing agüja lir, aser itemji United States nung doses million 225.6, China nung doses million 216.1 aser India nung doses million 138.4.

Ajisüaka linük shia nütsüing yongsük den medemdangra Israel nung timba agütsüogo, kong Israel nunger nisung ter nungi nisung trok nem iba mozü agütsüogo.

Iba sülen United Arab Emirates lir, kong nütsüing yongsük shilem 51 dak tema nem iba mozü dose kabosa

agütsüogo, United Kingdom nung shilem 49, US nung shilem 42, Chile nung shilem 41, Bahrain nung shilem 38 aser Uruguay nung shilem 32 nem iba mozü agüja lir.

European Union nung coronavirus mozü doses million 128 shi nütsüing yongsük shilem 21 nem agütsüogo. Linük 27 agi akumba bloc nungya Malta temaba jenjang nung lir, kong nütsüing yongsük shilem 47 nem mozü ya agütsüogo aser iba sülen Hungary lir, kong nütsüing yongsük shilem 37 nem agütsüogo.

Saka Germany nungbo nütsüing yongsük shilem 22.6 nem dang mozü ya agütsüogo, Spain nung shilem 22.3, France nung shilem 20.5 aser Italy nung shilem 19.9 nem agüja lir.

Alima ajunga nung iba mozü agütsüba ya ita ka majungdang anasü agi timba akum.

Makamait linüktem timba nung COVID-19 mozü agütsüba sentong tenzükogo, ibai talisa COVAX programme ajanga lir. Item linük nungya alima nütsüing yongsük shilem 16 lir, saka mozü shilem 47 nem agütsüogo.

(Maneni tapak 9 nung...)

Russia-i Alexei Navalny indang Network nokdangtsü akok

Moscow, Rongchii/April 25 (Agencies): Russia-i tepuok dak yua aliba opposition lenir Alexei Navalny indang political aser anti-corruption networks nem tenokdangba agütsütsü akok. Iba jenjang agiba ajanga sorkar anemer tulutiba raksatsütsü.

Tenokdangba agütsüba ya Hombarnü Moscow court nung ki shibanga yur sangdongtsü imlar aser kulitem ya dena state indang meim ken o ka lir, ta Washington Post sangdong ka ajanga metetdaksü.

Navalny indang attorney dang ken o mangadang tsüingda pa nem file agütsütsü ta shiogo,

ta Navalny tembar Ivan Zhdanov-i ashi.

Okadak yagi Navalny indang political group aser Anti-Corruption Foundation ya extremist organizations ta sangdongra iba ya Islamic State, al-Qaida aser Taliban den yongrü kati aitsü.

Amnesty International-i ashiba agi, iba jenjang agiba ajanga, Soviet puti otsü sülen tang rights to freedom of expression and association dak kanga mejungi kongshitsü, ta kasa sangdong ajanga metetdaksü.

Kasa sangdong ajangasa, Navalny indang yimiyim; "Russia will be happy" ajenoker

aliba refrigerator magnets ayokba mesera T-shirts asemba atema tepuokdaki yoktsü akok. Navalny team züngsemtemi maneni inyakra parnoka küm trok atema tepuokdaki yoktsü akok, ta metetdaksü.

Russia nung ketdangsürtemi Navalny aser pa pusemertem aika election nung tokteptsü memelar aser temelaba magiba longkak aitba sentongtem ya ozüing alema inyakba maparen ka kümtsüogo mesera item sentongtem nung maneni shilem agiba ya ozüing alema inyakba maparen ka kümtsüogo aser ibayongji nisung aika tepuokdak nungi jenbotsü atema jenaogo.

Submarine nung alir ajak süogo: Indonesia mitkar

Bali, Rongchii/April 25 (Agencies): Indonesia indang samar aliba submarine ya Bali anasa tzüyim telung nung süksar nguogo aser yangji alir par 53 prong süogo, ta mitkartemi Deobarnü ashi.

Iba submarine bushirtemi 'live vest' densema oset tasentem ngutet, aser item ya küm 44 tain KRI Nanggala-402 indang südi ta amanger, koba training agitsü renemba mapang osang magitepteti akum.

"Kulitem nung ajemdaker KRI Nanggala ya tzüyim telungi alu aser yangji alir ajak süogo ta shiteter," ta mitkar tekolakba, chief Marshal Hadi Tjahjanto-i osangbener dang ashi.

Indonesia indang submarine pongu aliba nungi KRI Nanggala ya Indonesia kübok Bali asetkong anasa sama.

"KRI Nanggala-402 ya asem kuma raksa. Rong temang, rong tejaklen aser shilem tongti ajunga balala sadang aser shilem tongtiba nung paksar liasü," ta Navy Chief of Staff Yudo Margono-i ashi.

Tzü telung feet 2,600 dak dang tarokba lur nungi Deobarnep signal tem angu aser Singapore ajanga agütsüba tzü telung nung submarine bushiba gol ka amshia jangjatet.

Deobarnü iba rong nungi shilem talila angu aser item rongnung rongnentsü aser yangji alirtemi agiba 'safety suits' tem dena lir, ta Tjahjanto-i ashi.

Bali Sea nung iba rong ngutetba indang Indonesia Tir Joko Widodo-i jangjatsü aser asür kinungertem den asükhulemsatet.

"Indonesia nunger ajungai iba lendong, talisa submarine nung alir kinungertem den tejashi lemsateper," ta ashi.

Iba submarine nungi jakzüka aliba oset kar ngutetogo saka tang tashi rongya kong aliar mejangjateter, ta tzüyim sepaitemi Honibarnü shia liasü.

Iba submarine bushiba nung United States, Australia, Singapore, Malaysia aser India linüktemi teyari balala agüja arur.



Canberra, Rongchii/April 25 : Anzac Day anogomung nüngtem nung sentong ka April 25, 2021 nü Canberra, Australia nung aliba Australian War Memorial nung agia liasü. Rara aser peacekeeping operation mapang linük tenzüker nem Australia nüburi akum agüka liasü. Australia aser New Zealand nung sepaitem bilemteta Deobarnep Anzac Day sentong agidang nisung meyirijang aika dena liasü.

Oscars 2021 nominee tem sangdongogo

Los Angeles, Rongchii/April 25, 2021 (Agencies): Küm shia agiba ama, 2021 Academy Awards sentong nung 2020 ajunga aser 2021 küm indang shilem kar nungi film tajungtiba asadanga award agütsütsü terenemba lir. Taküm February

ita 93buba Academy Awards sentong agitsü renemer liasü, saka Covid-19 wara süshia maoba ajanga ita ana sülen iba sentong agir alitsü. Iba Academy Awards sentong ya tawa agiba Golden Globes ama virtual aser nisung

- Oscar 2021 nominee tem yamai alitsü :	
* Best Actress in a Supporting Role	The Trial of Chicago 7- Aaron Sorkin
Maria Bakalova- Borat Subsequent Moviefilm	* Best Animated Short Film
Glenn Close- Hillbilly Elegy	Burrow, Genius Loci, If Anything Happens I Love You, Opera, Yes-People
Olivia Coleman- The Father	* Best Live Action Short Film
Amanda Seyfired- Mank	Feeling Through, The Letter Room, The Present, Two Distant Strangers, White Eye
Yuh-jung Youn - Minari	* International Feature Film
* Best Actor in a Supporting Role	Another Round, Denmark
Sacha Baron Cohen- The Trial of Chicago 7	Better Days, Hong Kong
Daniel Kaluuya- Judas and the Black Messiah	Collective Romania
Leslie Odom Jr- One Night in Miami	The Man Who Sold His Skin, Tunisia
Paul Raci- Sound of Metal	Quo Vadis, Aida, Bosnia and Herzegovina
Lakeith Stanfield- Judas and the Black Messiah	* Nominees for Sound
* Actor in a Leading Role	Greyhound, Mank, News of the World, Soul, Sound of Metal
Riz Ahmed- Sound of Metal	* Film Editing
Chadwick Boseman- Ma Rainey's Black Bottom	The Father- Yorgos Lamprinos
Anthony Hopkins- The Father	Nomadland- Chloe Zhao
Gary Oldman- Mank	Promising Young Woman- Frederic Thoroval
Seteven Yeun- Minari	Sound of Metal- Mikkel EG Nielsen
* Actress in a Leading Role	The Trial of Chicago 7- Alan Baumgarten
Viola Davis- Ma Rainey's Black Bottom	* Cinematography
Andra Day- The United States Vs Billie Holiday	Judas and the Black Messiah- Sean Bobbit
Vanessa Kirby- Pieces of a Woman	Mank- Erik Messerschmidt
Frances McDormand- Nomadlan	News of the World- Dariusz Wolski
Carrey Mulligan- Promising Young Woman	Nomadland- Joshua James Richards
* Best Director	The Trial of Chicago 7- Phedon Papamichael
Another Round- Thomas Vinterberg,	* Visual Effects
Mank- David Fincher, Minari- Lee Isaac Chung,	Love and Monsters, The Midnight Sky
Nomadland- Chloe Zhao,	Mulan, The One and Only Ivan, Tenet
Promising Young Woman- Emerald Fennel	* Best Animated Feature Film
* Best Picture	Onward, Over the Moon, A Shaun the Sheep Movie: Farmageddon, Soul, Wolfwalkers
The Father, Judas and the Black Messiah	* Best Original Song
Mank, Minari	Fight For You- Judas and the Black Messiah
Nomadland, Promising Young Woman	Hear My Voice- The Trail of the Chicago 7
Sound of Metal, The Trial of Chicago 7	Husavik- Eurovision Song Contest: The Story of Fire Saga
* Best Original Screenplay	io sien (Seen)- The Life Ahead
Judas and the Black Messiah- Will Berson, Shaka King, Kenny Lucas, Keith Lucas	Speak Now- One Night in Miami
Minari- Lee Isaac Chung	
Promising Young Woman- Emerald Fennel	
Sound of Metal- Darius Marder, Abraham Marder, Derek Cianfrance	

Thor: Love and Thunder nung Russell Crowe-i Zues shilem agitsü

New York, Rongchii/April 25, 2021 (Agencies): Hollywood star Russell Crowe, shiba 'Thor: Love and Thunder' A-list nung anioka liasü, iba Marvel Cinematic Universe film nung pai shilem agitsü aliba role osang lemsatepogo.

Iba film tangokba tesem - Australia nung Gladiator actor Russell ya Thor nung tongti shilem agir Chris Hemsworth aser Tessa Thompson na den külemi tangokba noksa ka social media sabang ajanga nguogo.

Australia indang Radio show "Joy Breakfast with The Murphys" den interview agiba mapang, Crowe-i, "Tang, kü bicycle nung mener Disney- Fox studios-i aotsü aser 9:15 meta Thor 4 nung Zues ama ni shilem agitsü. Tanü kü nem lemozüksüba shilem tatembuba tangoktsü," ta ashi.

Marvel Comics nung Zeus ya Greek nunger indang anüng aser tsümgok tsüngrem ka lir. MCU nung Thor-a tsümgok tsüngrem ka lir asünung, Zues ya Avenger indang tsükchir mesüra tembar ka ama adoktsü teyongyaba lir.

Crowe dak alaka, Christian Bale-i "Gorr the God-Butcher" shilem agitsü ta jangjaogo. Matt Damon, Luke Hemsworth aser Sam Neill, shirnoki Thor: Ragnarok nung Agardian actor ama adok, parnoki tanaben project tasenba nung shilem tilala agiba angutsü. Mellissa McCarthy-ia Hela ama Agardian actor den külemi adentsü.

Maneni, Natalie Portman-i Jane Foster ama shilem agitsü aser film tasenba nung Jane ya Thor ama kümer Mjolnir' ajungketba angutsü. Parnok dak alaka, Jaimie Alexander-i tanaben Lady Sif; Tessa Thompson, Taika Waititi aser Jeff Goldblum nungeri Valkyrie, Korg aser Grandmaster ama shilem agitsü.



Auckland, Rongchii/April 25, 2021: Eden Park Stadium, Auckland nung New Zealand indang kentener telok Six60 puri ayongba kenten sentong nung fans tem saksalemba yangi angur. Honibarnü, Eden Park kübok ayongba mezümg concert sentong nung terepranger 50,000 matsümgdang Six60 band-i parnok indang tour sentong shilem tatembuba takok ngua agiogo.

Akshay Kumar-i sen cr.1 tenla agütsü

Mumbai, Rongchi/April 25, 2021 (Agencies): Tawa, Covid-19 wara nungi taneptsü ngur sülen, nüngtugu Bollywood star Akshay Kumar-i Gautam Gambhir indang foundation nung sen cr.1 tenla agütsü. Covid-19 wara anema raraba mapatong nung pusema Akshay-i tenla agüja liasü.

"Tang ama tensa mapang lenla balala nungi teyari anguba ajanga teimla ka agütsür. Nüngdakba pur ajangzüksüsa, chiyongtsü, mozü aser oxygen atema #GGF nung sen cr. 1 tenlaba asoshi @akshaykumar

dang kangasa pelaba metetdaksür! Nü mapa tajung asoshi Tsüngremi moajangma,' ta Twitter sabang ajanga Gambhir-i lemsatep.

Gambhir indang tweet' nung telangzüba agüja, Akshay-ia, "@GautamGambhir, tang alima tensa tamajungdang, nü foundation nung teyari agütsütsü maongka anguba atema pelar. Iba timtem yakta süshia aotsü imlaa atar," ta lemsatep.

Acting tsütsü, tang Akshay-i pa indang taruba film Ram Setu tetangokdak lir.

India nung Acer Spin 7 saya

Mumbai, Rongchii/April 25, 2021 (Agencies): Acer India-i 2021 küm atema Acer Spin 7 laptop sayaba sangdongogo. India nung Qualcomm Snapdragon 8cx Gen 2 processor aketba laptop rongnung 'Spin 7' ya mezümg alitsü.

Spin 7 laptop nung 5G connectivity - mmWave aser Sub-6 5G connectivity anaprongla dena lir, koba Acer indang laptop rongnung iba feature ya mezümg asütsü.

Iba laptop ya convertible design ka lir aser 360-degree hinge inoktsüogo. Microsoft Surface lineup tasenba nung Snapdragon platform agütsüba sülen, India nung laptop category tasen rongnung Acer Spin 7 alitsü.

Acer Spin 7 specifications

Acer Spin 7 nung Qualcomm Snapdragon 8cx Gen 2 angutsü, koba ARM-based Kryo 495 custom CPU core 8 agi achayangtsür aser 3GHz tashi alitsü. Iba den külemi laptop nungAdreno GPU dena lir aser company-i ashiba agi, laptop yagi 4K HDR video maparen süsümedema inyakteter.

Acer-i Spin 7 indang RAM

asert storage variant tasazük memetetdaksü, ajiasünung iba laptop nung SKUs agütsütsü asoshi osang mali. Acer indang e-commerce listing nung taoba Spin 7 nung Intel Core i7 7th gen processor aketba shia lir.

Tanga sangdong ajanga angazükba agi, Acer Spin 7 nung 14-inch full HD touchscreen LED display ka den 360-degree hinge keta lir, koba convertible Windows 10 PC ka ama amshitetsü.

Iba laptop touzük seret 1.4 aser 15.9mm temelem lir. Spin 7 nungsa backlit keyboard den gold lettering angutsü aser Acer Active Stylus amshitetsü.

Security atema, Spin 7 nung Windows Hello login aser activation den fingerprint authentication aser face recognition inoka yanglutsüogo.

Acer-i Spin 7 nung 56Whr battery ka inoktsüogo, koba khi charge nung ghonda 29 tashi amshiteter. Acer Spin 7 nung operating system ji Windows 10 alitsü aser USB-C port 2 den 3.5mm audio port angutsü.

India nung Acer Spin 7 jenjang sen 1,34,999 alitsü aser laptop ya online den offline retailer tem ajanga angutsü.

Alima nung COVID-19... (Tapak 8 nungi...)

Alima nung tang tashinung mozü agütsür aliba ya asadanga makamait linüktem nung agütsüba ya shilem 0.2 dang lir, ta United Nations ajanga ita tetenzüklen shia liasü.

Linük 12 nung COVID-19 vaccine agütsü metenzük, aser itemjiAfrica nung tenet (Tanzania, Madagascar, Burkina Faso, Chad, Burundi, Central African Republic aser Eritrea), Oceania nung asem (Vanuatu, Samoa aser Kiribati), Asia nung North Korea aser Caribbean nung Haiti alitsü.

"Alima nung mozü lemsaba tsütsü taoksatsüka meputep lir," ta World Health Organization tekolakba, Tedros Adhanom Ghebreyesus-i April 9 nü Geneva nung osangbener senden ka nung ashi.

Amshitsü asoshi temelaba agütsüba sülen timtem balala ajuruaka AstraZeneca aser Oxford University ajanga yangluba mozü ya timba amshir, aser mozü agütsü tenzüker aliba linük aser territory 156 nung iba mozü ya amshir.

Pfizer aser BioNTech nati yangluba mozü ya linük 91 nung amshiogo.

Moderna ajanga yangluba mozü linük 46 nung amshiogo, Sinopharm ajanga yangluba mozü linük 41, Sputnik V ajanga yangluba mozü linük 32 aser Sinovac ajanga yangluba mozü linük 21 nung agütsüogo.

SANGDONGER

Nübur shirnoki Koieler aser Borieler an chanu aliner, Mokokchung Police Point anasa Hospital road nung koba Dokan ali, yangji 26th April to 30th April 2021 tashi anepdang 8 ako nungi ayoktsü.



TONGTEPRATEPAK :
8974713183 / 9378167532



Rajasthan Royals aser Kolkata Knight Riders ta asaya RR-i akokba sülen captain Sanju Samson aser Miller na pelatepba noksa nung angur.

IPL maneni asayayonga aoba ajanga len labalala nungi aitsür

Chennai, Rongchii/April 25

(Agencies): Indian Premier League (IPL) maneni asayayonga aotsü, ta asayamung ayongertemi Deobarnü metetdaksüogo, ajisüaka iba sentong ya nisung aikati aitsüogo, kechiyong linük nung tang Covid tashidak menar aika kuma timtem tulu nung lir.

New Indian Express aser sister publication kati Deobarnü IPL osang mesangdongtsü telemtetba agiogo aser kasa mapang nung fan tem aikati social media ajanga IPL aitsüogo.

IPL governing council züngsem kati Reuters dang ashiba agi, league ya fan tem medeni bio-bubble ka kübok asayar anungji asayamung

teküzmükba kübok maneni asayatetsü.

"Asenok meketa timtem tokrong balala aliba IPL ajanga amadokdaksür," ta ketdangsür kati ashi.

"Auh Delhi amala venue nung tashidak menar potetogo, ajisüaka Hyderabad aser Indore nung standby venue ana lir anungji nüngdakra iba tesem ana ya amshitsü," ta paisa ashi.

India nung Deobarnü tashi nung COVID-19 tashidak menar 349,691 jungogo aser Delhi aser linük kübok tesem balala nung medical oxygen aser yipden peria maliba ajanga shirangertem aika meyipa yoktsüsa aküm.

Chennai nung amendaker aliba New Indian Express-i

ashiba agi, linük nung tasü aser taküm tensa dak ranglokdaksütsü atema IPL osang mesangdongtsü atema parnoki telemtetba agi.

Australia nung asayar Adam Gilchrist-ia pa tebilemba lemsatepogo.

"India nung alir ajak dang Best wishes lemsateper. Tetsübuttsüka covid agi shiranger aika kümдар. #IPL maneni asayar. Tim masü asü? mesera tensa amadokdaksütsü atema aonungshia tongtibia sentong ka? Kechi bilemdir bilemaka sarasadem nenok den teti dena lir," ta Gilchrist-i tweet asü.

India nung tashidak menar million 16.96 jungogo aser asür 192,311 jungogo.

Tokyo Olympics tia Medical Expert temi lemtettsüla: IOC Official



Rongchii/April 25, 2021

(Agencies): International Olympic Committee (IOC) Athletes' Commission züngsem kati ashiba agi, global sports governing body-i masü saka medical experts temi Tokyo Olympics asayatsü masayatsü telemtetba agitsüla.

Canada nung Olympic ice hockey gold medallist Hayley Wickenheiser-i, Canadian Broadcasting Corporation (CBC) dang ashiba agi, "Iba telemtetba ya corporate aser

shishilemba tulutemi masü saka medical aser health experts temi agitsüla."

"Asayamung methi asayatsü telemtetba agira ken o kecha memeimshi jangja jangja rasa ashitsü nüngdaker. Iba asayamung dak sendaka malir kati asayamung ayongzüka asayatsü tim asü masü aji ashitsüla. IOC-i iba telemtetba ya magitsüla," ta lai ashi.

"Wara anepaludanger aliba doctor aser physicians tem

asur Olympics asayaba ajanga kecha ajangzüksü mesera akoksatsü maliba nisungtemi iba telemtetba agitsüla," ta laisa ashi.

Covid-19 tashidak menar tali akümba ajanga Japan Ato Kilonser Yoshihide Suga-i Tokyo aser Kyoto, Osaka aser Hyogo prefecture tem nung nung ano emergency benoktsü atema tetuyuba agütsüogo.

Osaka nung Hokolbarnü nisung 1,162 dak tashidak potetogo. Iba tesem nung anogo pezü atonga nisung 1000 tema dak tashidak poteta liasü. Kasa mapang nung Hyogo nung nisung 567 aser Tokyo nung nisung 759 dak tashidak poteta liasü.

"Osaka aser Hyogo prefectures nung tashidak tapu tasenba menar shilem 80 dak tema liasü aser Tokyo nung tashidak menar shilem 30 dak tashidak tapu tasenba potetogo," ta Suga-i ashi.

Emergency ya Deobarnü nungi tenzüka May 11 nü tashi benoka atatsü.

English Football-i Social Media nung shilem magitsü lemtet

Rongchii/April 25, 2021

(Agencies): England nung Football Association (FA), Premier League aser English Football League (EFL) densema football asaya achaayangba lokti tentetemi April 30 nungi May 3 tashi social media nung shilem magitsü telemtetba agiogo. Tawa online nung asayartem mezügmeshiba sülen parnoki iba jenjang agitsü lemtet.

April 30 nung nikongtsütsü 3:00 ako nungi May 3 nü 11:59 tashi social media nung shilem magitsü atema telemtetba agiba ya online nung asayar aser football asaya dak sendaka alirtem maneni mezügmeshiba atema telangzüba ka lir, ta Premier League-i sangdong ka ajanga metetdaksü. "Asayai social media ajanga nüburtet tongtetba aser social media jenjang kanga tongtibia ta angateta lir. Asaya pusemertem shirnok football temulung lir, parnok den sendaktepa alitsüji kanga tongtibia lir, ta kasa sangdong ajanga metetdaksü.

"Social media nung shilem magitsü telemtetba agiba ya tetsür aser tebur football aser Premier League, EFL, nung shilem magi liasü.

Women's Super League (WSL) aser Women's Championship ajak nung benoka inyaksangshitsü. Parnoki Facebook, Twitter aser Instagram accounts ajak shibanga ayutsü," ta Premier League-i ashi.

Premier League tekolakba Executive, Richard Masters-i, "shilu dak ajemdaker nisung ka mezügmeshia amshiba agizüksü makok aser social media nung asayartem mezügmeshiba ya maneni inyakyonga modaktsütsüla," ta ashi.

English club tem rongnung Manchester United nungi asayar Marcus Rashford aser Liverpool nungi asayar Sadio Mane nung tawa social media nung parnok shilu dak ajemdaker mezügmeshia liasü. Borussia Dortmund nungi asayar England international Jude Bellingham-a iba ajanga kongshiogo.

Welsh second division club, Swansea City, aser Scottish soccer champions, Glasgow Rangers-i hopta ishika tejakdang online nung mezügmeshi inyakyim anema telangzüba agüja social media nung shilem magi liasü.

Babar Azam-i Kohli indang record ajatetogo



Harare, Rongchii/April 25

(Agencies): Pakistan captain Babar Azam-i Deobarnü alizüng tasen ka tongteta, T20I format nung run 2000 takaratiba yangluba asayar kümogo.

Babar-i iba alizüng ya Zimbabwe den Harare Sports Club nung T20I final asayaba mapang tongteta liasü. Pakistan captain-i T20I asaya 52 nung run 2000 yanglu, koba India captain Virat Kohli dang nungi asaya pezü agi tajemba asütsü, shibai asaya 56 nung run 2000 yanglua liasü.

T20I cricket nung Kohli maneni run timtiba yangluba

asayar lir aser Babar-i run 2035 yanglua pa jenjang 11buba nung lir. India team captain yagi 52.65 average nung T20I run 3,159 yanglua lir.

Bodhbarnü sayaba ICC T20I player rankings nung Kohli maneni jenjang pongububa nungi masetshir lir saka Babar jenjang ka tejak dangi tua tanabuba tongtetogo.

Babar-i tawa kanga junga asaya aruba ajanga tebur ODI player rankings nung pai taoba hopta Kohli ajateta temaba jenjang tongtetogo aser iba hopta kanga junga asayaba sülen pai point 47 nguteta T20I rankings nung Finch ajatetogo.

BILEMDANGANG

**"Masü tsüngda tangar kabosa
ajungmesotsü merangang."**